

*evigilemus justè ne inter peccatores & ignorantés Deum habendi simus d. l. 1. Cor. 15. 3 5. confer. Gal. 4. 8. 1. Thess. 4. 5. Joh. 7. 17. Heb. 8. 11. Sicut enim veritas ac fides Dei, quam sequimur credendo, & doctrinam cognoscendam includit, & virtutem honorandam in revelante: ita in credente fides qua sequimur illius auctoritatem, & notitiam includit, ex gratia revelatam, & affectum honorantem ex gratia inspiratum, quo det gloriam Deo, Rom. 4. 20.*

LXXIV. Hic affectus autem, in genere quid esse potest aliud, quàm inclinatio voluntatis qua inniti cupimus & acquiescere fide Dei, nihil formidantes ea quæ injicere dubitationem aliquam poterant? quando mediante inclinatione Spiritus sanctus assensionem efficit, & assensione mediante inclinationem firmat, & utraq; mediante alios porro motus & fructus profert, inclinationi & assensioni divinæ consentaneos. *Vide supra num. 19. & 5.*

LXXV. In specie autem respectu promissionis de remissione peccatorum & vitæ æternæ, inclinatio ejusmodi voluntatis qua acquiescimus fide Dei non formidantes legem, peccata præterita, diabolum, infernum, mundum, mortem, &c. quæ dubitationem poterant peccatoribus & infirmis injicere, nihil utique aliud esse potest quàm fiducia illa quam perpetuo